

四庫全書

集部

欽定四庫全書

集部

林蕙堂全集卷十三

四

詳校官檢討

臣

劉錫五

助教臣常循覆勘

總校官編修

臣

王燕緒

校對官助教

臣

卜維吉

膳錄監生

臣

茅

琳

欽定四庫全書

林蕙堂全集卷十三

湖州府知府吳綺撰

亭皋詩集

五言古

擬今日良宴會

芳條茂青陸名彥盛東都相逢輩洛畔列坐高李徒玉
盤進華食朱瑟揚妙歆羅衣舞春烟欲進嬌含臚主人

前致語努力為歡娛良遇不得再榮名難有餘請君視
皎月倏忽翔金烏

擬明月何皎皎

天末斂餘霞娥輝澄素練虛影入房櫳庭花靜如霰我
有所懷人皎然若相見但恐在遠道陰晴異鄉縣躊躇
步前楹飛鴻落清怨何為久離居阻隔歡與宴

擬庭中有奇樹

條風振遲日珍木發奇滋亭亭百尺榦枝葉相扶持豈

無琴瑟用箕見鸞鳳安羽儀邈難即榮落亦有時芳華
不自薦歲蕤當為誰

擬結客少年場

豪傑推三輔輕肥重五陵經過向燕市橫幘飄長纓劍
怒白虹出酒激浮雲蒸所得在意氣赴急如秋鷹大息
顧兩儒矩步趨時名笑覓荆高侶狂歌變徵聲

古意

長安二三月朱樓臨廣衢上有良家子蛾眉揚青臚君

子遠行役既嫁還獨居下顧見游女婉孌相馳驅明璫
攜素手日夕飄華裾中心豈無慕時命固有須伉儷分
未足琴瑟義有餘東鄰視彼美未聘其何如

客秣陵送孝威之壽春

天末起寒雲涼飈動砧杵愛此秦淮秋後先作行旅故
人敦素盟授館得羣處蕭條白板牀一燈夜中語兩見
明月出行歌互爾汝何來歲暮心催君下西楚譬彼兩
黃鵠乘風一軒翥徘徊顧山椒零落在毛羽憂心從中

來默默如何數壽春爭戰場今古具樓櫓君去得所依
長吟入軍府嗟哉沿江屯衣帶亦成阻我去苦未能新
寒薄締紆離魂難奮飛翻為悔歡聚

又

搖搖河上舟蕭蕭岝嶸傍草明明殘日中云是遠行道攜
手上河梁涼風吹窈窕相視長歎息淒然念綦綰日月
難相知危疑速人老豺虎橫四遠掩戶恐不早胡為久
行役東西學飛鳥子歸會有期子行宜及曉毋將王粲

心依依向劉表

中林堂望月次芝麓先生

落葉滿天地秋殘無定聲
愛此寒兔魄當軒淒且明
君子重良會酌酒寫我情
歡笑良有以嘆亦無事成
周游歷廣榭踟躕步前庭
蕭蕭月中影宛若池上萍
離別既以遠敢不懷
令名濁醪古人意盃盡聊共傾

又

河漢邈無極大道直如髮
作客不得歸畏見牀頭月
徘徊

徊懷遠情矯首望天闕但憂尊酒空坐令芳華歇貴賤
會有命持刺欲何謁請看天上星安得久不沒

賦得流螢夜聚書

虛館易成陰華牕黯初夕高人寡所營夙好在羣籍愛
此丹鳥光飛飛向瑤席入幌似流輝臨編如弄色方粲
更生藜遂映長卿壁持照不自私微明欲相益匪不慕
高翔願依君子側

折楊柳

楊柳未成花春風滿妾家送君辭妾去折柳捐芳華芳
華寧可久誤妾青閨守蛛絲網鈿箏蝶粉塵歌袖柳花
今復飛不見紫騮歸相思無處說還夢入空幃

塞下曲

日暮黃雲飛天山夜傳箭男兒好身手結束事征戰劒
血污金鞍袍花染成茜勢絕無援兵投憤目如電不恨
死沙場所恨君不見坐令刀筆人議論明光殿

野雉詞

野雉備五色耿介異羣鳥偶有稻梁懷翔翔出林表獵
徒山中來彎弧正誇巧盡命鋒鏑間離披墮豐草羽毛
匪不佳一誤失衆好徒羨雙飛鴻冥冥入秋顓

詠史

竇氏耀朱纓霍家驟華轂勢極不自持翻如未嘗足豈
知天道微龍亢固多辱意表發奇殃顛覆累厥族東門
邈難期華亭恨相續何如曳尾龜全生在溪澳

採桑篇

紫陌春風路柔條壓春樹曉起自攜筐盈盈採桑去非
直為蠶饑畏郎無好衣銀鉤正欲採驚出黃鶯飛鶯飛
何決絕踏得桑枝折寧知桑樹中更有離人別

督亢陂

荆卿西入秦手持督亢圖雪恥用盜術託智無乃愚不
知壯士意成敗匪所虞殺身表不平要以明區區匕首
一得力六國無丘墟英風振天地博浪心相符誰云荆
高侶落魄但酒徒

樓桑村

炎精既凋謝中山獨後昌
昭烈龍準姿卓犖生遐方
古老傳此地昔有百尺桑
下蔭潛龍宅上礙高鳥翔
西蜀既發跡羽葆增輝光
至今不可見行野空徬徨
因思南陽事豁達同高皇
崎嶇成鼎足大運良可傷
咄哉陳氏子帝魏真荒唐

黃金臺

烈士愛立名寵利非所求
胡為千里足而以黃金投將

無徇薄俗匪此意不綢我來弔遺跡躑躅尋高丘失禮
地亦異平楚蒼然秋傷哉楚童瞳矧印生仇讎

張華宅

張公晉人傑博雅誠多才依違事悍后亂至遭嫌猜徒
能識寶劒不悟圻中台豈非當局人席寵迷素懷茲地
乃遺構歲久成蒿萊梁棟不可恃華屋安在哉同時有
張翰秋風遽歸來至今大湖滋祠廟何崔巍

賈島峪

房山一深峪曰有唐詩人賈島昔寂寞狂吟驚貴臣高
秋吟落葉歲盡祭詩神遺編骨尚瘦千載傳苦辛才奇
命不與遇困名獨伸匪逢昌黎翁滅沒同灰塵蒼蠅附
驥尾知己良足親哀予不復見老淚徒沾巾

劉司戶祠

神奸弄大柄威懾唐公卿劉君草茅士對策抒不平含
毫鬼神泣下筆風雷生主者不敢視棄擲鴻毛輕身雖
竄遐域身歿珥朱纓廟食歷數代光與日月爭當時得

意人或同腐草并乃知千載事所重非科名

感遇

清暑寂無營垂簾掛朝旭庭有百尺槐團團蓋蒼蔚上
枝拂雲電下枝蔭華屋凡此尺寸材蒙茸託其族既免
暎陽焦又得晚風謖根株得所依神志曾無辱願言永
垂陰庶保歲寒綠

又

豐城有長劍雷渙測其精荆山有頑璞卞和識其榮智

者不虛賞微物昭令名嗟哉斯人徒忽與草木并所冀
遇君子寄托抒微情肝膽不敢賤軀命固所輕斥鷃在
枋榆無藉難自行蒼蠅附騏驥乃陟千里程

又

岱宗高不極膚寸潤方州渤海廣無際吐納資萬流古
之至德人動為物所求偉哉李元禮列坐羣賢優昌黎
特後起賈孟皆從游一顧亦云偶終古稱驂騑所以重
感恩烈士身為酬耿抱知己心日月無窮休

雪後望西山

朝出城東門極望西山際積雪冒層巒凝陰覆松桂一
白亘遙空幽翠偶虧蔽山上尚重寒城中落新霽為想
古巖人袁安正高憇嗟予客金門四見朔吹厲策馬度
深泥絕壑徒流睇何時老雲麓梅花兩扉閉還共同心
人煮酒聽鶴唳

峴山

我聞羊叔子登臨俯襄沔如何來茲邦有山復名峴出

郭既不遙入林亦匪淺高樹瞰碧波古徑緣蒼蘚亭下
老石尊顏李昔流涵清風邈難即盛德固所緬願言沂
流光幽芳或可褰

道場山

郡閣望南山城頭入晴翠乘舟汎湖濱所望乃其背策
杖至山椒曠然闢幽邃清泉泛瑤碧古剎擁蔚翠旁有
伏虎跡莓苔綠無次拾級上層巒放眼乃無際烟中數
飛甍雲邊認歸柁浩然吳越間秋色落吾屐乃知玉局

翁愛山固有意

法華山

吳興清遠區西北富丘壑長松列崇岡十里送芒屨香
靄化人城幽奇虎頭作策杖赴巖阿蒼烟滿叢薄亭影
落遙空湖雲澹寥廓下泛九曲池泉香流羽酌水底漾
仙螺枝間宿靈雀徘徊不可極爽然遂吾樂

杼山

望嶺陟岑堯沿溪入葱蒨遂至夏王村復越黃蘗澗三

癸遡遺踪登高足忘倦清流繞芳原晴陽疊層巘山谷
乃不殊雲嵐時互變東南煙華生城郭了如見遙思顏
平原夙與開士善高唱蒼花間塵外有遐羨

昆山

昆山視諸峰小大若邾莒崛起無因緣翻恥與衆伍我
來陟層巔危樓勢飛翥四顧見諸峰環抱反若俯晴溪
繞其足淡蕩百花渚所惜高木陰何時就斤斧坐諷吳
均篇慨然念時遇

東林山

放舟凌陂塘汴汨訪靈跡言尋貝錦峰云是東老宅畫
榴不復見葛井鮮行汲躡屐登山樊曠然得所適平楚
浮霽煙山雲共秋碧振衣火爐頂清泉汎瑤席黃鶴何
時來臨風欲生翼

碧巖

弁嶺如率然碧巖乃其腹枯栢衍陂陀蒼蒼滿椒麓石
磴幾盤紆重崖互回伏當其登頓時一上一換目屢憩

始得達曠朗見晴旭下視七十峰波裏夕陽綠飛沫洒
明珠懸泉掛寒玉幽池出雲飛蜿蜒駭靈族憑空一舒
嘯乃信世塵促

學士山

玉湖浸春煙柔嵐翠相接遙睇學士山與峴適屏列遇
賞若爭高崖峨況自別地僻行無踪榛莽不容塵絕頂
老蒼雲環坐席可設茵染莓苔紋足底過舟楫一經高
賢來霞上跡不滅春物正駘蕩清暉共怡悅歸來綠竹

聲蕭蕭在林樾

栖賢山

高天淡若陰春風動林藪我來問寒條倚櫟龍溪口山
路平可馳梅花拂我首濛濛雪色中風香互先後十里
無停驂馬上勸行酒我聞管仲父栖遲在茲久古蹟不
復尋飛英落金斗

丘路

仙蹤罕近尋武陵邈難即豈謂南郭間乃有避塵跡便

娟修竹園窈窕幽人室方春桃作花夾岸絳英積溪山
多艷姿鷄犬帶霞色頽光靜相照永日不知夕入望無
淺深但覺世情隔遐哉柴桑翁作記有餘憶

登龍山絕頂望太湖用康樂韻

春色生東南良辰引孤眺屢陟蜿蜒背排雲入蒼峭振
衣覽震澤一碧與霞曜泠泠林樾間魚龍聽長嘯我時
栖山樊久處欲忘妙捫蘿快所覲得免猿鶴誚既愜丘
壑情彌羨滄洲釣舉手望煙客相期發幽調

和澹心雨中見寄同用少陵風雨暗荆蠻五字

為韻 選四

古澗入深竹白雪相無窮我來拾瑤草晏坐青桂叢
睇髮弄寒雪幽翠生微風

又

莓苔長卧閣浮萍冒庭礎俛首視八極懷抱不能數
所賴有素心燒燈共深雨

又

故人隔河渚相念如平生
貽以瓊瑤字讀之增古情
乃知千古事不在高與荆

又

獨處少良覲久居無壯顏
人生貴自適何事眉睫間
終期五湖裡駕浪同魚蠻

讀長兒粥飲詩因示之

簪組豈不樂憂患多所招
曰歸逢歲儉況乃無東臯
饑來不自得時復嗟汝曹
糴貴婦增歎炊稀僕漸驕
賴聞

哲人語凍餓生賢豪金門已云遠臣朔嘗自嘲折腰雖
不遂扣門徒用勞園花待春發得酒還逍遙

咏史

裊裊巖巖邊藤鬱鬱澗傍樹人生各有為因緣在時遇嗟
彼漢馮唐失意亦以數文武豈無宜老壯失所據所以
慷慨人白首多顛仆棄置等無才憔悴亦多故

又

曼倩少讀書蓄意匡時難待詔非其情金門等朽散滑

稽良有因神仙豈非玩囊粟苦長饑誰能濟屯渙割肉
徒歸來細君得無嘆

又

廣漢本循良治郡有奇氣遇事乃風生身命兩無避剛
直為禍媒高明遭物忌一蹶不復伸殊非聖王意當代
亦已矣徒為後人愜

送冒巢民歸雒

入夏在三月江湖尚春色良友多奇懷為樂不可極胡

為忽言歸徒令衆心惻驟別兩情深餘歡百憂積人心
不能靜世事殊未息蛾眉一見妬豈在得與失舉手送
君行髮白難再黑我身非冥鴻安能避矰弋有約且復
來流光共相惜飲酒聽清謳葆真庶無斁

擬古

燕趙多佳人容光鏡華悅有美獨空谷所懷在貞潔含
臚揚清謳被服日馨越願言御君子歡愛兩無歇胡為
不見知坐廢桃李月將無金屋人蛾眉更奇絕

秋閨曲

塘上芙蓉花秋來何孌孌辛苦向西風紅顏不知老

用因見古人情為韻奉送孔東塘還朝

性拙與時悖早歲辭冠紳閉門絕塵鞅寂寞江之濱偶
然值文舉到巷停朱輪一笑出蓬戶如覲骨肉親並坐
梧桐下高談多異聞得句輒心賞有文常共論相過每
相得無間夕與晨乃知性情合夙昔固有因

又

君子負奇節聲名滿華甸偉哉聖人孫不復伍時彥文章婉韓歐經綸羞管晏

天王幸闕里講道數稱羨大用方有期試可在明練洛汝乘四載疏瀹任所便往來江海間遂與鄙人善天地自非常吾儕日覩

又

大道鮮常經行止會有數漢帝召賈生歸應受宸注行當綰清要馳驅滿皇路獨我意拳拳留君願少住君亦同潸然低徊念心素況我年既耄何時更星聚惜別在

河梁臨波不能度矯首指雲鴻翩翩各千古

又

人皆以祿富君獨以官貧辭家二十里寵遇成苦心餐
飯不得飽而獨羅衆賓賢勞不能息而獨談奇文新詩
溢囊匣曾無錢一緡寧知碑沒字阿堵堆埃塵胡為戀
朋好離別感更真嗟哉此何世乃復見斯人

又

仲冬天氣肅雨雪道難平況復鮮裘褐悲風聞鴈鳴驪

歌方在遠慷慨登王程別酒既滿筇別淚還霑纓遙望
見天末乃有白玉京君今從此去行行重行行梅花不
可折柳條空自縈云何當此際而不傷我情

小孤山

大江西南來日夜萬千里惟此潯陽口吳頭亦楚尾何
年蒼龍盤奔濤屹然砥翠壁挿浪生丹巖向天起杳靄
絕躋攀雲波互奇詭上有神人居綽約世無比昔云藐
姑仙想像或若此誰能望彭郎相思滿秋水

石鐘山

江盡欲成湖有山如列障對峙兩青蒼嵯岬百千丈我
泛輕舟來心目忽俱暢巉峰不可攀懸壁但能望一石
各一色萬石乃萬狀樹木役鬼工樓臺架靈匠雲嵐恣
奇譎江流莽涵養潮至聲始鳴風來響逾壯舍楫躡層
巖天水迷所向始信髯蘇文相與共奔放惝恍白雲中
飛仙在其上

游志歸巖和王文成公壁間韻

贛江有靈境，日日益好晴。
雨冒高雲遠，近絕羣島我。
來後人前已，讓前人早振衣。
多所懷塵襟，詎能掃。

過景鳳山精舍訪王汲公

聞山輒意移，況復良朋在。
忻然荷籃興，攜手入香界。
花氣落盤觴，綠陰滿襟帶。
良會無近情，高言談往代。
舉目睇層雲，秋山若相愛。
莫惜秉燭遊，離鴻渺天外。

題靈山道院

憚暑不成行，故人留我止。
攜襆入山家，棲息良有以。
倚。

檻賦新詩銜觴亦云屢在再送長日煙華發紅藍明月
忽復盈秋深入池水艤楫章江湄振衣還欲起豈不念
懼愛行役曷能已黽勉赴前期雲山自茲始

別池上芙蓉

池上芙蓉花似解人將別當我欲去時紅英正奇絕臨
風故婀娜映水轉鮮潔我本相思人對之徒悵結酌以
一杯酒芳華願無歇

松臺社中送江眉瞻太守還柳州

人生當仕宦遠近皆王程遊子復何為而亦萬里行相逢各意外宛若水上萍臨風道心素慷慨同霑纓歡言未幾夕乃忽事邁征聚散亦有期親愛殊非輕別離在天末詎能如平生送子一杯酒中有今古情此邦雖遐僻子厚昔所營山川或未移黎庶甫離兵相望有景風努力崇令名

咏古分得東坡

東坡本奇才天子曾見知多才亦多忌流竄無餘時崎

峴嶺海間但和淵明詩才奇不得發聊復工文辭文辭
多怒罵益為禍所基當其嘻笑中時時亦含悲嗟哉古
今才遇知乃見奇零落付春夢徒為婦嫗嗤因之念往
事慷慨垂涕洟拂衣兮歸來歸臥南山陲

登衡山

炎德莫能殫神宮位丹鳥高峰七十二翠峯在雲表我
從羅浮來耽幽恣窮討舍楫陟層巒一徑入幽渺上有
千尺松下有百靈草芙蓉迴難攀祝融奇未了曠觀東

南際廬霍一何小宛如大海洋青螺浮浩淼雲壑互靈
譎氣候換昏曉佳晨發奇懷遺世欲忘老徘徊弗能去
振衣苦不早乃聞李鄴侯半芋不得飽憂生金紫中何
如衣白好

集梅旅看庭中秋色各得五言六句五首用秋
色無遠近為韻

名流多逸致暫住亦成幽即此一畝宮林泉恣遠游天
風下庭樹葉葉生高秋

又

衡門不數武披衣共晨夕
酌酒聊為歡論文互相得愛
此石上苔青青古人色

又

秋花何爛漫顏色紛且都
幽獨以自媚一一紅珊瑚笑
問東籬菊曾逢醉叟無

又

盛夏艱雨澤枯槁懼不免
如何此中花紅黃入秋眼夕

陽娛酒人會心不在遠

又

置酒臨前除鮮華自相競
況值白露滋玩目不能定
遲暮豈所傷獲與君子近

送程山尊還里

程子我好友卓犖負奇氣
賦詩務高言飲酒得真意
今秋來廣陵我亦從吳至
望衡在同巷披衣輒相詣
醉醒既不殊歌呼各有致
胡為似黃鵠青雲忽高逝
執手向

旗亭躊躇攬征騎人生懷遠情動靜必有寄翠艷豈耽
娛乘時貴行志願言崇景光春風或無異

送汪扶晨歸黃山

廣陵一片月淒其泣秋露賴此今古人言情托詞賦汪
子雲霞姿文采宿所具今年過竹西披襟日相遇慷慨
向江海纏綿在朝暮飲酒豈不樂赴義鮮歡緒忽歸蓮
花峰復以故人故舊好尚不忘而況在心素以此感同
人惜別重相聚置酒曲江濱攬袂隋堤路送子以遠心

斜陽獨延佇

喬東湖來自新安以黃山詩見示有作

我本黃山人不向黃山住終日念黃山雲泉結心素子
從何時行擔簦最幽處匝月烟霞棲憺然得真趣示我
一編詩靈竒莽回互萬壑與千峰盡入行間貯問君何
能爾不復知其故相持輒大叫羨極還成妬

林蕙堂全集卷十三

欽定四庫全書

林蕙堂全集卷十四

湖州府知府吳綺撰

亭皋詩集

七言古

青山下望黃將軍墓道

霜花入江江樹紅半江落日搖悲風此時客向青山路
遙見松楸竄狐兔推蓬指問黃頭郎云是將軍神道處

將軍束髮事邊疆浴血榆關四十霜射鵬并挽雙飛韃
回馬常持半段鎗曾經搏戰烏桓賊手戮長鯨襄水赤
上相頻分卧內符諸侯競屈轅門膝手縛渠魁未報恩
漁陽鼓入延秋門西京已下仙人淚南國還招帝子魂
馬渡瑯琊從此化將軍定策同王謝豈知艷曲號無愁
亞子空呼李天下天下龍髯痛未消臨春明月響瓊簫
中涓廝養橫宮錦丞相家兒挿生貂就中更有陳雷子
宮門夜半傳黃紙盡逐元豈舊黨人半閒堂裏烟塵起

傳檄言誅刁與劉武昌楊柳作邊愁巖疆已付中行說
壯節空思祖豫州將軍義憤填懷抱洗日虞淵何足道
一朝失計在移軍清風小用臨江嘯倚劒空持南壁天
北來烽火照甘泉橫江零落千尋索下殿倉皇七寶鞭
此時將軍鎮姑熟宮中夜到驅黃犢紫髯怒吼陣雲昏
虞歌夜泣蛾眉綠平明戰鼓動江鴉裹創猶呼御賜駒
鳴弦豈意來鵝尾拔刀空聞叱虎牙可憐魂染胭脂血
蒲首歸來事難說幾年墓木拱白楊夜夜猶然叫鵝鳩

我聞此語心傷悲為指江涘之高壘當年廟算列四鎮
此地實為君封陞癡兒不了公家事模糊顛倒山河字
罵賊不及雷海青弄兵竊效田承嗣將軍抗表建牙旌
討逆應先李茂貞一喝逆流萬人死摧枯拉朽無堅營
樓煩出射弓矢墮錦裘繡帽如雷火紫電橫飛靈寶刀
紅冰膩結連環鎖至今白骨滿蒼山折戟猶存戰血斑
豎子無成悲廣武詞人多恨哭江南吁嗟將軍復何有
從來運數多陽九留守魂遊宋氏河監軍淚滴唐家酒

吾徒意氣豈能灰當時所用違其才夕陽下山黃葉雨
江風颭颭魂歸來

戴尚書銀印歌

尚書戴公渤海英諫書早動承明庭勲業已過杜元凱
詩篇不數劉長卿有時點筆畫丘壑丹崖碧水雲烟落
不將綵繪競聲名但取經綸寓盤礴此時四海漸無故
天子神明託豪素上苑羞圖宋帝鷹中林愛寫宣皇兔聞
公名姓識公才勅使頻教供御來百尺搃溪圖海岳千

番蜀紙畫樓臺畫成催進翔鸞殿展看遙聞

至尊羨已裁宮錦賜天衣宸章更使朱提鍊

御製丹書四字篇上言米芾畫中禪下言烟巖世所少吁嗟汝說

真其傳印凡大籀一十六螭鈕龍函裏黃袱天上中涓一騎
來人間忽見雲霞簇詔曰作畫盡教鈴賜汝子孫寶無

失小臣此時適在旁親見君臣契如一我聞塞夏當年

曾有此糾繆繩愆傳國史又聞宋室鄭介夫流民作繪

譏當途元宗昔日好觀畫曉曉為進比干圖吁嗟大臣

愛君固有道筆墨微茫存典奧公權託諷豈無因公乎
公乎何以報

報國寺雙松歌

昔年曾讀燕臺記聞有慈仁松特異古老寧知種者誰
離披轉失栽時意于今時世已滄桑雙樹猶然拜梵王
乍見但教生錯愕頻來還許立蒼茫蒼茫意氣何奇特
耳目之間從未得天矯不肯上蒼天拗怒何時穿白石
石裂天荒不可支橫拿側出如相持坤輿震圻盤覆又屋

海水翻騰走萬螭左者斜窺右者仰上出雕甍下玄壤
翠濤橫舞覺風來碧蘚平鋪看月朗月朗風來年復年
霜催雨折見前賢大夫不受秦官辱君子誰從晚歲傳
我來看松敬松表欲語松奇翻莫道荒唐如讀漆園書
縱橫似見張顛草吁嗟雙松兮雙松松兮何始將何終
樓桑已斧廟栢爨吾欲持此歸鴻濛

送髯孫赴粵幕

銅馬門前橫晚照年年別淚沾春草丈夫牢落忽從戎

送君又出漁陽道憶君年少讀奇書樓畔停車玉不如
珠勒遊曾同白下持毫詩擬過黃初此時意氣凌霄斗
醉挽胡姬弄楊柳起舞時聞越石雞雄篇不換長卿酒
無端憔悴向長安蜀道偏歌行路難勢去田文空感慨
愁來范叔只饑寒飄零巷北連茅屋細語空堂夜燈綠
幽憤難教鶚鷁知途窮却向銅駝哭一朝楊僕擁戈船
十丈牙旌下九仙揖客將軍稱大樹登臺賓客愛紅蓮
美君擲筆心偏壯拂拭吳鉤笑相向飛檄應教百郡傳

凱歌會令三軍唱我泛葡萄酒持玉鐙為君倚筑歌吳聲
依人漫作思鄉夢失路寧為出塞行君不見陸郎夜策
羊城騎橐內黃金鳴得意又不見伏波高柱矗雲中椒
駁還論新息功男兒致身會有處安能老向東湖住潮
轟戰鼓打崖門月照零丁人未渡韓柳文章儋耳詩送
君南去日相思手中但有長纓在莫戀花田飽荔枝

送稼公南歸

京雒多秋風行人踏黃葉嗟君磊落不得意告余欲向

蘆溝別君家代住麻姑山萬里樓開碧玉闌揮金只說
論交易拔劍寧歌行路難行路難長安道朝百年暮難
保君來獨抱書一囊五侯座上能昂藏秋入寒山尋賈
島晚披荒草哭昭王愛才淝水陳參佐為君特設南州
坐梁園佳句最先成燕市高樓常獨卧咄咄長安多是
非酒酣拂袖忽思歸言尋雪水烏頭舫還掩秦淮白板
扉

房硯歌

吾家阿咸能好奇示我古硯光陸離云是貞觀房相物
孟津宗伯曾臨池我視此硯質頗古刻篆迴環蚪蚪伍
翰墨相傳幾代人莓苔尚積千年土千年山骨斷秋烟
幾代詞壇噴玉泉試看龍尾無他潤把似鸛睛讓此堅
因思仙李飛龍見房杜乘時逢主眷朝攜鏤管上瀛洲
夜草麻音歸制院此硯曾經傍偉人琉璃為匣錦為茵
張家賜鐵不足數衛國結鄰非所珍貴重應言世無有
寧知更落尚書手紅燭筵前五鳳成青藤紙上千蛟走

兩轉風華未易論一朝淪棄委離根野人已作塵泥賤
過客誰知琬琰尊豈期今日遇吾曹拂拭重教染兔毫
乃知隱見皆時命人辱人榮固無定昭陵玉匣漳臺瓦
此日漂零無見者何如此硯點寒星還近揚雄舊草亭
乞歸為作陶泓傳更勒鸞臺小字銘

龍槐篇

興誠寺前雙古槐離奇鱗鬣長莓苔黑密地僻少人識
我看飛騰時獨來嗟乎託根貴有處此槐若向名園住

應知車馬客紛紛不數慈仁兩松樹

羽林將軍歌

羽林將軍虬髯郎手持白羽挽大黃一朝射虎三十六
空山猛獸俱摧藏白首老人前告汝此是羣彪非是虎
前頭有虎方食人一吼會令落爾弩

搥衣篇

龍城八月霜飛早月射榆關照衰草佳人夜半夢征人
驚起月中傷遠道殷勤機上拂流黃含怨含嬌下北堂

雙砧不敵離情重
雙袖頻將皓腕揚
羅袖低還舉砧韻
多
淒楚萬里青天雁
語哀一階黃葉蛩
吟苦初徐後疾
意難舒乍重還輕
力漸無班姬空作
閨中賦蘇蕙誰傳
塞外書塞外征人
年復年閨中思婦
淚潸然五更試聽
響猶徹一夜定知
愁未眠此時月落
滿天涯此時離客
正思家中亦有鳴
機婦為聽寒砧淚
似麻

韓繡行

天上雲襄隔銀渚
吳宮絲絕難重數
涿水曾傳顧氏娥

蘇臺今見韓家女韓家女紅稱最奇劉郎珍重不輕攜
官閒畫舫陳烏几酒罷巾箱出紫綈鶴紋素綾不盈尺
八幅神鍼留異跡設色如開張藻圖寫生欲奪遼鸞筆
第一梅枝第二蘭幽香拂拂指頭看唐英偃雪魂俱淡
湘佩臨風影不乾三為古石四水草玲瓏蕩漾皆天巧
辟邪僵卧莓苔深沙虹跳擲蘋花老五六蛺蝶飛秋華
碧畦菰菜茁霜芽次七靈芝光爛漫次八老竹形敲斜
內中此君尤叫絕碧幹蕭疎才幾葉瀟湘江上一枝風

簞簞谷裏三更月後題小楷字難捫玉篆鈴朱更絕倫
都無彩筆臨摹跡況復金鍼點綴痕虎頭家製多曾見
霜禽露卉生宮線一朝斂手作夫餘尹邢並坐應低面
劉郎劉郎誠快哉此卷從何覓得來請君更展紅牕帙
爛醉冰堂綠酒杯

憶昔行送友沂居憂還楚

憶昔君來邗水側虎氣龍文時莫測船裏孝廉書等身
車中洗馬人如璧此時有客傾佳釀相逢不覺驚瑜亮

得意寧教餘子知。期已在諸公上。從此城南日相見。
酒社詩壇攜手遍。雨夜同聽越石雞。清秋共炙君苗硯。
交情冷煖杯中酒。爾我相看稱耐久。阮達嵇狂兩性諳。
指因分金無不有。無端草草入長安。路近朱門行更難。
槐市橫經方接席。薇垣奏賦又彈冠。朝朝點染紅菱紙。
聯騎鳴珂趨建禮。玉殿空簪西省毫。金門但索東方米。
似爾羞聯虎榜名。教予益悔蛾眉洗。屈指行藏十載中。
兩人青鬢看成翁。盧駱文章慚四傑。劉馮時命慨三同。

荏苒齊瓜時漸及，萋莪但爾仍垂泣。里人罷社為神傷，孝子還鄉猶骨立。為形為影忽分離，況復身當執紼時。送君獨上瀟湘去，此世知心復有誰。

送仲潛南還兼訊同社諸子

十年不到康山路，夢裏江雲隔春樹。憶昔當年廡下棲，貨卷早得舉君顧。此時廷尉綰金章，高名大節凌天閭。君家兄弟富文藻，馬氏白眉稱最良。伯也論交具雞黍，晨夕追隨呼爾汝。與君接袂不多時，把酒譚詩獨心許。

待詔無端同曼倩，離懷歲歲驚飛電。潞河雙鯉不傳書，
漁陽匹馬還重見。見君不為名利來，取卵危巢事可哀。
萬里艱難歸趙壁，三秋慷慨上燕臺。燕臺蕪沒堪長慟，
昭王死後黃金重。紫閣何人解設鯖，朱門到處長題鳳。
憐君意氣轉相投，匹歲浮踪每共遊。寒燈歲卧山中寺，
短筑狂歌市上樓。狂歌醉卧日相看，似爾渾忘歸計難。
豈謂秋風生短褐，却教明月照征鞍。高梁鞍馬紛斜照，
丈夫小別何堪道。心事寧須兒女知，圖謀肯使英雄笑。

為我傳言舊酒徒五陵同學漫踟躕長卿已倦遊梁興
欲向康山更結廬

唐先生歌贈唯一赴靖安幕

唐先生唐先生古寺棲遲歲屢更雪中獨裹平頭幘月
下空炊折腳鐺一朝慷慨別高秋為言身欲向南州早
歲途窮常哭阮半生計拙只依劉我謂先生且自寬年
來世事正多端馬空冀野徒留骨鯖廢侯門已罷餐吾
徒結客自肝腸意氣須教比雪霜請看花發安仁縣猶

有風清孺子牀

高士菴次謝在杭韻

去年曾掃莓苔跡今來又着登山屐木葉猶餘宿雨斑
溪光故繞秋烟白老僧開閣為傳茶依稀記得留題客
凭闌遙望郡樓遮落日徒憐飛鳥疾

鸚鵡曲

鸚鵡賦送黃祖鄴中才子多辛苦頭風愈檄只偶然黃
絹題成終見忤誰言老瞞能愛才橫槩眈眈氣如虎狂

生不容早自知快心且弄漁陽鼓
嗚呼王粲淒涼公幹
囚鼓聲至今疑未休

韓侯釣臺

秦鹿夜走咸陽宮
卯金亭長稱英雄
真人雲起芒山裡
大將星分楚水東
年少飄零不得意
帶刀蒲伏淮陰市
市兒驕笑如不聞
河邊自作垂綸計
當時終日理釣絲
敗項平吳世豈知
一旦手持刑馬券
十年身是打魚師
至今高臺臨大道
行人猶羨韓侯釣
假令當年功不成

荒荆空自橫斜照噫嘻丈夫須有才有才不遇徒蒿萊
請看雲夢藏弓慘猶勝淮陰乞食哀

長歌贈何德峻

朱雀航青溪垞我昔見君髮覆額張南顧北日追隨管
華筆硯常同席荏苒頭顱三十年秋風並作長安客落
拓君才過馬周嗟余困頓揚雲戟猶憶當年共被時荒
鷄起舞夜何其長纓欲遂縱橫志綵筆同書絕妙辭風
流豪氣人爭羨斯人合上金鑾殿豈知今日總無成鬚

眉改盡何郎面酌君酒為君歌人生得意苦無多請君
試看幾年內朱門華轂生風波勸君酒君莫眠莫愁湖
上有吳船不如爛醉鍾陵月笑倚文君綠綺絃

友沂席上遲髯淵不至即送歸泖上

堂上深燈懸急雨主人送客清觴舉此時京兆有田郎
離思遙如隔河渚去年戴笠記相逢驅馬長安紫陌中
媿我蕭疎同庾信愛君才調似張融醉歌燕市情何限
倒把吳鉤照人面丈夫意氣許千春等閒直覺肝腸賤

何為夜半忽思鄉夢到機山舊草堂杜羔且問歸來路
蘇武頻霑別後裳殷勤贈我一端綺千絲萬絲筭篋裡
感君厚意飲君心願君明歲重來此

吳伯子歌贈星子

吳伯子吳伯子濯魄冰壺應有此掉頭不肯揖王侯論
心直欲輕生死憶我見時歲丁未菰城初忝磨符佩君
來不屑潤脂膏登臺獨愛南山翠三年形影未曾分跋
燭官齋夜論文看殘更亮樓頭月寫盡羊欣白練裙宦

海顛危似累棋一朝賓客異雲泥翟尉庭前空噪雀孟
嘗門下少鳴雞廣霞先生能急難鵲鴿惟爾同憂患舉
幡博士擬相明貫械都亭亦何憚往來風雪曹娥渡痛
哭狂呼感行路黨人無意動星占破涕苔川再相聚嗟
乎一貴復一賤須臾改盡知交面幾人曾救李陵書幾
人解射聊城箭多君意氣凌高華筆墨還能妙天下清
吟常和謝元暉逸致每同嵇叔夜蕭蕭短褐獨能留南
北東西一蒯緱有時聞鐘宿古寺有時策杖升高丘田

間推罵寧為辱大小槐安春夢熟吾儕久已渾榮枯諸
君枉自勞翻覆吁嗟浮雲亦何有花前且共銜杯酒會
須攜手上青霞却指喬松是吾友

定交篇自錫山至陽羨訪陳其年作

涼葉何蕭蕭秋聲不能已我念同心人秉燭夜中起帶
醉言登陽羨船披衣便訪龍丘子蓄意含情二十年蕩
槳揚舠三百里是時聞君方卧病文園秋雨無人問到
巷方教市僧疑扣門並少兒童應空堂塵冷燕泥深滿

地寒蓬不知徑直入狂呼道姓名君驚躍出還相認共
道相思歷歲時西窗燒燭杳何期忽聞命駕論心素頓
使交衿慰別離龐向林間邀德操李從牀下拜袁絲寧
須雞黍方情洽自是文章有故知文章當代誰堪敵肥
水婁東常並席一朝零落嘆琴亡此道茫茫誰復識盡
讀韓歐那辨非爭誇遷固終難匹晒腹曾無郝氏書登
壇浪擬韓侯幟如君才華世無對笑視融修盡兒輩讀
書日破萬卷餘揮毫坐使千軍廢驪龍探出衆皆驚鷄

鵠題成人未醉懷藏錦繡亦何多筆架珊瑚獨無愧世
上公卿豈異人如君偏自嘆長貧屋頭天近翻無地門
內秋多不見春幾年裘敝長安道昨歲衣沾洛下塵原
無狗監難逢主不是龍門肯置身吁嗟君才鬼所妬無
我江東應獨步從來豪傑不孤行文有淵雲詩李杜我
遭磨蝎既投閒君嘆窮魚亦何誤同在江湖各有心天
生瑜亮寧無故再拜重申縞紵交雲門膠漆古非遙千
秋事業惟心許一代風期屬久要馬卿倦後還能遇方

朔饑來轉自豪況今

天子重文藻肯令才人老草茅噫噓兮肯令才人老草茅

彈魚歌

古人在官如在山魚鳥自得江湖間偶然一事亦有意
所以弋射非等閒南園五月新水平一時鱗羽俱生成
中有巨魚最貪餌跳擲常使波濤驚上客由來擅神技
霹靂何妨一輕試金丸脫手不聞聲朱鬣驚推杳然逝
我聞陽鱗為大族宓子當年曾治國看君此舉良亦然

却令旁觀嘆神速轉眼波恬碧草香飛觴燒燭宴東堂
五湖煙水綠不盡魚乎與爾還相忘

畫梅歌為金亦陶作

我生適當冰雪中長年傲岸輕春風不肯低頭學桃李
自顧頗與梅相同所以愛花得花性尤愛寒梅清影映
孤山種後豈無人庾嶺寫成誰折贈耿庵先生冰雪姿
一生獨與梅相知每聞落筆高寒處常似暗香浮動時
我昔求之不能得夢裡月明空有憶似我長懷處士風

多君正得先人筆閉戶閒房春草深茗爐書卷坐長吟
有時得意不得意揮毫似入羅浮林一枝兩枝東風好
千株萬株春雪曉珠明粉淨四山空月落參橫歲華老
我聞畫竹有成竹淵明愛菊人如菊君今父子愛梅花
應知累世能遺俗我住江南春復春每逢吹笛暗傷神
何當乞寫含章樹長見林間月下人

聞其年以博學弘詞薦為賦短歌

陳郎五年不得意青衫頽落凌雲氣忽聞

天子下徵書鄉里小兒叫奇事兵興以後文章賤牙郎估客
乘高輿盡謂黃金可致身公卿那用張華研吾儕有字何
堪煮賤賣長門人不與妻兒大笑乃公癡何如且學揚州
賈陳郎本在泥塗中一朝走入甘泉宮掀髯脫却犢鼻
褌乃知吾道非終窮吁嗟小兒小兒汝莫嗔當今
天子重才人

妾薄命

妾薄命命薄復何言憶昔與君初見日青蛾紅粉彈朱

絃豈知歡處君心變千端要好翻成怨說盡相思君不
知別從桃李選芳姿芳姿任取金釵列但願蛾眉都勝
妾

研山草堂歌

闔閭城下雨翻盆楊花柳花春色昏客子衝泥自相過
研山主人方閉門主人本是長干客烏衣巷口曾相識
老大猶牽舸上船飄零更泛湖邊宅我聞主人年少時
胸中萬卷蟠龍螭無雙風度張思曼第一才名杜牧之

初聞隴右黃巾亂江左高談尚清宴才子新傳白紵辭
諸公競愛青紉扇共許雲霄可致身綵毫題徧曲江春
誰言諸葛非名士曾見相如賦大人餘子區區何足數
桓伊長笛彌衡鼓終生棄繻直尋常乘風萬里須臾取
那知世事劇堪憐荆棘銅駝起暮烟塵生東海悲遼鶴
日落西川哭杜鵑撇却羅衫豈無意東籬早辦黃花計
慷慨長懷弔古心顛狂不改凌雲氣憶我相逢白下秋
廬江賓客盛南州何人最倒中郎屐獨爾同登庾亮樓

更值長沙貴公子二十四樓明月裡仰天大笑燭花紅
斫地哀歌劍光紫幾年梁苑兔園開四海羣推授簡才
不信飛鴻殘雪散空教歸燕夕陽來黃土可憐埋玉樹
晨星落落知何處謝公棋罷北邙田羊生筆折西州路
江頭歲歲哭西風手把奇書歎轉蓬酒人對影黃壚在
詞客傷心白鬚同苔雪扁舟須我友水嬉共折南湖柳
愛山臺上夜燒燈韵海樓中春對酒行路俄驚蜀道歌
人間怪事逐年多劉郎不作秋風客內翰還逢春夢婆

短夢亂山堪一笑。貂蟬撇向邯鄲道。廷尉張羅有雀飛。
魏其解印無人到。多君相對眼還青。醉中痛讀離騷經。
君既移家石湖墅。我亦寄跡滄浪亭。兩人意氣長相得。
更向柴桑數晨夕。將兒同上朗陵筵。呼妻直入龐公室。
牆頭過酒日相娛。奇字傳看世所無。積有篇章招漫叟。
渾忘歲月老潛夫。潛夫漫叟時相見。閱盡從前古今變。
冷煖交情尚莫論。輕肥世態寧堪羨。況今之世乏張華。
鶴書何事來山家。豈無馬骨金須惜。縱有龍泉眼似遮。

海內茫茫知己盡空山種菜安吾分素軫猶知處士情
青樽且撥先生悶君不見阮籍嘗登廣武城城邊曾見
古人行事去英雄徒感慨時來豎子忽成名又不見處
仲衡悲唾壺缺夜半長歌皆欲裂老驥長途力未衰壯
士暮年心轉熱吾儕學道日徜徉肯似前人動激昂元
卿竹徑新抽笋且臥花間一草堂

過南康值陰晦風駛不得登廬山舟中遙望有

作

湖雨湖烟失昏曉片帆去疾如飛鳥半日過盡彭蠡湖
一生漫說匡廬好匡廬別我豈忘情我憶匡廬殊未了
待得看足羅浮花歸來與汝五老為六老

章江歌贈別丁鴈水觀察

章江江水連揚子雪浪奔濤四千里方伯連州半是誰
才子逢時今有幾田郎當日說丁郎畫省曾含雞舌香
譽望獨高孔北海文章不讓沈東陽幾年從此存懷抱
遙睇鬱孤春縹緲何期此日得相逢雲氣如來瞻紫帽

知余山水舊情深秋到常同著屐尋有時並坐竹中榻
有時共鼓花間琴示我新詩竟盈尺展看霞光紙中出
英雄坐屈千人軍奇傑橫排五丁力朝華夕秀不足言
玉聲金色定誰先長松獨聳破海霧江花一笑含春烟
吁嗟此道真樵父文士相傾靡不有虞山景陵低復昂
信陽歷下君知否多君大雅輪獨扶一代荆榛手剪除
衆步不趨趨獨步人無弗有有所無棣華有客能相和
揮毫競落真珠顆軾轍連鑣出錦江機雲對屋俱參佐

今年雙槩過炎州江邊相愛即相留贈余白疊裁涼袷
飲我清瑤破亂愁因君留止白鶴觀盡日追隨了無倦
奇文欣賞恥雷同新聲共倚同稱善旗亭列拜有雙鬟
兄弟能如晏小山淮海屯田送謳唱南唐比宋如等閒
共言此道亦茁軋蠻語參軍殊刺刺吾儕須作鳳皇鳴
何事巧偷鸚鵡舌言已大笑還相持盡傾三百金屈卮
人生意氣苟相合生死貴賤同肝脾況今

天子崇風雅侍從長楊並班馬急須持此懸國門莫使文

瀾任狂瀉如君此日多盛名時人共說春陵行相輝
花萼並壯盛竚看珥筆登蓬瀛笑我崎嶇過嶺海
薑桂平生猶不改未能彈鋏動諸侯只恐梅花久
相待飲君酒為君歌壯心一往無風波人生聚散亦
有數會當離別將奈何將奈何與君別臘盡南荒無
雨雪信旗風裏寄詩來如君共看羅浮月

端州訪硯歌

俊人安能如德人端州之硯精絕倫我來訪硯如

訪友蕉白花青期不苟至寶誰知果難得山骨雲
根人不識市中頑質鈍且堅高價無端濫取錢鴈
鵲有眼知何在蠻箋象管無光彩吁嗟良才不可
遇人生榮辱寧非數硯兮硯兮來與俱相攜且著空
山書

七星巖題名歌

山水無日無人遊遊人去盡山水留今人古人春復秋
青山日笑人白頭我今放浪來端州七星巖正在東

南陬勢如北斗星光侔峰巒綿邈奇且幽神剗鬼削
非人謀我得此山如朋儔朋儔到此還綢繆徘徊日
夕恣窮搜願得名姓同山丘磨礱苔蘚相雕鏤記人
記事詳復周手書大字如龍虬吁嗟人來人往水中
鷗當時宜無公與侯只今磨滅如蜉蝣誰其知者
空悠悠吾儕但得忘百憂新詩美酒同唱酬傳與不傳非
所求何必千載垂無休天風謾謾吹破裘相與大笑凌
滄州

江南曲

江南三月雜花生江上游人春眼明琪樹家家栖海
鶴垂楊處處帶啼鶯就中最愛長洲苑江草江花
照人面紅粉偏多時世粧青樓曉霧雜衣香吳姬家
在橫塘住卷簾正向花深處十五彈箏不解羞玉釵
羅袂映春流少年寶絡桃花馬見此徘徊腸斷者醉
倚黃壚看數錢琵琶一曲心相憐

讀秋笳集有感呈徐健庵同年

憺園主人愛才客畫舫襖飲虞山側兩行菡萏燭籠
明十斛葡萄瓮花碧持觴中坐忽無歡座客同歌
行路難似聞猛雨穿窻入覺有西風拂面寒手把
一編雙隕涕為言此向遶邏寄冰天萬里雁頭書
雪海三年魚腹字我時聞語益淒其傳看知為李
子詩長笛吟成關塞怨悲笳吹動故鄉思關塞故
鄉輕一別父子弟兄長決絕處處都非梁苑雲年年
空望吳江月吳江舊事早傷心年少才堪賦上林酒

畔篇章鸚鵡筆花前詞曲鳳皇琴自言揚馬寧容
讓乘風好破宗生浪射策何堪餘子間成名合在
諸公上那知天際有罡風未到蓬山路已窮命薄早
憐逢市虎才高翻悔學雕龍咄嗟彼婦誰為此痛哭
無由訴

天子獄吏三章屈未伸流人一去生如死悽惶嶺外草蕭
蕭回首黃沙望度遼子卿歲月非為久定遠關山未
是遙二十餘年沉黑海身居禹載堯封外山川總異

夢難尋面目都非魂枉在樂非其樂悲非悲憂從中來
復何為哀歌淚下三生誤長嘆聲中萬事非似此猶然
盛文藻鴛鴦翡翠行間巧公主墳前怨落花都尉臺邊
惜春草不為流離減異才應知天意本昭回屈平遠放
騷經作李白長流好句裁今古才人同一局當時那解
憐珠玉姓字唯須後世知文章莫向秋風哭讀罷主
人為我言索來此冊非徒然人才可許風塵妬書卷須
為天地傳我聞此語咨嗟久從來此道需朋友詞工海

日豈虛稱人有雲龍方不朽可憐交誼近來輕車笠憑
誰念友生榮枯久已難同類患難何緣更借名多君厚
意誰為報坐客傳聞共相告人間若此重繡囊塞外肯
容長皂帽況今

天子選英流袞袞諸公在上頭如何間擲雙雕箭不自添
修五鳳樓嘻嘻世事真難問鉛刀盡鼓龍泉鈍富貴
多緣夙世因飄零自合吾儕分酌君酒為君歌勸君且盡
金叵羅桃花不得東風力落盡春紅可奈何

寓樓聽雨

天意欲無晴樓高多雨聲雨聲多在梧桐裏聲聲送入
愁人耳愁人竟夜欲無眠雨止還聞啼杜鵑極目烽煙
方滿路男兒落托無歸處燒却兵書擲蒯緱猿臂少年
今白頭

檐蛛歎

蜘蛛張網大于轂日傍雕檐求果腹有爪有翼不敢羅
但取微蟲遂其欲翩翩蝴蝶從東來來偶因花發暫徘徊

無端忽被風吹上，悞觸羅網。何其哀吁，嗟蝴蝶兮蝴蝶。
文采輕翾，誠可悅一身。已自飽貪餐金粉，塵縈同敗葉。
蜘蛛之腹，方皤皤持竿小兒。三兩過竿，碎汝網。磚汝腹。
蜘蛛蜘蛛爾奈何。

趙雙白招飲蕤屋歌

五月梅黃清暑天，我時來放泖湖船。天水才人趙二火，
為予設食開華筵。趙君本是漳南客，採蓴却泛吳淞宅。
結友偏能愛冷人，作詩不肯從時格。長卿四壁都無有，

脫衣換得臨邛酒，伯通廡下日高吟。
新詞婉麗如秦柳，憶昔相國江夏公。
歌殘正氣騎飛龍，西臺慟哭走萬里。
獨收碧血歸萇弘，君是奇人好奇句。
十載幽棲長閉戶，不知誰肯薦凌雲。
我又搖搖載秋去。

秦松歌為黃仙裳賦

黃郎著書經歲月，平生磊砢多奇節。
謾長存傲雪心，巖巖獨具干霄骨。
終年聽松不得志，虬幹龍鱗得松意。
却從泰岱憶秦封，與松相望未相逢。
吁嗟秦松空自好。

黛色蒼髯長天矯一自當年號大夫至今草木嗟虛狗
何如空山得自在千年以後為仙腴松乎松乎誰知已
顏生畫向澄心紙黃郎展圖日相對一片蒼煙白雲裏

送曾青藜歸光福山

南豐曾子人中豪機雲與吾皆久要十年以來各奔走
人琴淚落新亭酒今年與仲為客同握手揚州夕照中
揚州舊是鶯花地四海賓朋多意氣酒國詞場有戰爭
袒臂軒眉無次第多君壯志時激昂龍章鳳質如嵇康

玉山不改澄波度綵筆長分皎月光予獨沉吟甘寂寂
愛君顧我同晨夕不待雲門奏曲終此心自許膠和漆
吁嗟友朋離合皆有數當時豈少相逢處肝胆須從末
路知論交却悔平生誤明年鄧尉梅花開我欲浮家更
一來願君汲取三萬六千頃為我釀作葡萄醅

題顏修來吏部從

駕

十月長楊肅氣增上林狐兔避霜鷹漢家羽獵誰陪從

共說相如在後乘相如今非臨邛客
星宿源流傳究國
論詩不讓杜陵人
獻賦直登揚子室
遭逢

聖代有輝光
珥筆薇天第一行
扈輦獨圍紅
鞵帶承

恩常佩紫荷囊
休源獨誦金華殿
叔則清通誰不羨
一朝傳
寫向人間虎頭
絲筆何郎面
依然意氣欲超羣
文采風流冠
六軍
豈有棘門還按轡
須知司馬自凌雲
嗟予在昔依
香案
紫禁黃扉曾染翰
草制頻教女侍傳
填詞數被君
王歎
一下蓬山二十年
夢中無復聽鈞天
赤龍已去馮

唐老空羨延之白馬篇

詩永鏤板向為巨賈攘取崔蓮生轉運命便送
還賦長歌以謝

風詩久陵替大雅其何如一時攘竊此實多誰其蠹者
非白魚嗟余淪落無善狀十載著書多激忼竊謂三唐
已後無詩人拘儒此語誠謬妄李唐以來朝數更各有
風氣各性情蛩鳴蟬嘯厥有候鳳凰豈為鸚鵡聲是以
編摩時最久刪詩斷自三唐後非唐實欲以存唐黃鐘

瓦缶原何有一時傳寫徧西東
黎棗資成賴鉅公誰識漫藏當
喪馬翻從寄貯失雕龍
江淮巇賈曾無字蜨九
鼠璞空多事只疑萬卷貯曹倉
猶似千金在秦市幸逢
憲節駐邗州夏澤春膏徧地流
心清但飲廣川井公暇
還登文選樓忽聞此事即大笑
汝曹那識陰何妙葱肆
寧須挿架籤泥塗不是謨觴道
遂教秦壁返邯鄲合浦
明珠去復還既如良友能重遇
又似名山得再觀海內
同聲嗟嘆羨護持風雅真稀見
況復仍鐫彤管編閨房

今古開生面吁嗟平山之堂高百尺江上羣峰環黛色
堂前楊柳比甘棠猶是廬陵親手植醉翁去後千餘年
清河三戟生大賢平山所產復來此平山平山非偶然

庭桂

揚州七月桂花發填街溢巷聞芬芳兒童採折競入市
百錢乃得枝頭黃我家庭桂開獨晚八月已半纔吐將
夜聞猛雨恐零落呼童張幙為遮藏也知得酒須得月
更言惜花當惜香笑為山妻留一朶與爾痛飲需秋光

薰染襟袖盡奇馥何必遲早爭低昂


驚蟄日置酒于守中堂梅花下為短歌以紀其

事邀長白同作

人間已負看花約來與山梅同寂寞此花昨夜忽全開
雪影離離生綠萼相攜綠酒向花前共道此花勝去年
五木呼盧揮大斗繞屋寒花如映手花兮花兮甚有靈
將開未開吾眼明肯為酸風還閉目獨愛此花看不足
想見山空月上時江南江北寄相思

將進酒

將進酒酒滿金屈卮勸君且飲莫須辭人生憂與身相
隨墮地一聲先是啼鼎鼎百年惟恐遲功名富貴須臾
時何以解之惟醇醪古人今人不相知伊周賈董皆塵
泥淵明太白真龍鵬君今不醉將焉為君今不醉將焉
為



林蕙堂全集卷十四